

30/07/1997

Kikis sikap kedekut ilmu

LANGKAWI, Selasa - Pemikiran masyarakat perlu diubah supaya mereka sanggup berkongsi ilmu dan teknologi untuk diperluaskan kepada semua, kata Datuk Seri Dr Mahathir Mohamad.

Menurut Perdana Menteri, sikap kedekut ilmu dan teknologi akan hanya menyebabkan apa yang dimiliki tidak akan tersebar dan tidak mampu digunakan sepenuhnya.

"Apa yang kita lupa ialah kita kerap kali menentang pemindahan teknologi jika kita memilikinya. Apabila orang lain memiliki teknologi, kita pula mahu mereka memindahkannya," katanya ketika menjadi pengantara sesi perbincangan 'Teknologi Untuk Ekonomi Baru' pada Dialog Antarabangsa Langkawi 1997 (LID'97) hari ini. Perdana Menteri turut mengadakan sesi perbincangan tertutup dengan ketua negara dan kerajaan yang hadir.

Dr Mahathir yang merasmikan dialog itu semalam merujuk kepada sikap kedekut bomoh Melayu pada masa lalu sebagai contoh ilmu dan teknologi tidak dapat diperluaskan dan memberi manfaat kepada masyarakat secara menyeluruh.

"Di Malaysia dulu, kita mempunyai bomoh yang berupaya merawat orang sakit. Bagaimanapun, mereka tidak mahu langsung mendedahkan rahsia rawatan itu. Mereka menyimpan rahsia itu supaya dapat terus meraih hasil daripadanya.

"Kalaupun mereka bersikap pemurah dalam menyebar teknologi yang dimiliki, ia hanyalah kepada anak-anak mereka," katanya sambil menambah sikap seperti itu menyebabkan ilmu berkenaan tidak tersebar dan tidak dapat digunakan sepenuhnya.

Kesudahannya, kata Perdana Menteri, kerana bomoh itu insan biasa, mereka semuanya mati dan teknologi yang dimiliki terkubur.

(END)